

【经文信息】大正藏第 10 册 No. 0300

大方广佛华严经不思议佛境界分 1 卷

No. 300 [No. 301]

大方广佛华严经不思议佛境界分一卷

唐于阗三藏提云般若译

如是我闻：

一时薄伽梵，在摩揭陀国，于菩提树下，得阿耨多罗三藐三菩提，成等正觉。其菩提树，根深坚固，善植于地，如栴檀柱。树身佣长，傍无枝叶，坚实圆满，名阿湿波他。所有诸鸟，不能飞过。皮肤细软，文象如绫，无量枝条，妙饰间错。其叶表里，素绿庄严，叶脉显现，如紺青色，枝叶垂下，周匝圆满。其花开敷，甚可爱乐，光明照耀，香气芬馥。其根茎等，显种种色，具足众德，如妙高山。其下严饰，如欢喜园，光明香气，一瑜缮那量，夜分远烛，如大火聚。其地四面，普皆平坦。于中有草，柔软滋茂，光色鲜洁，如孔雀毛，有妙香气，令心悦豫。无量小树，周匝围绕。其菩提树王，庄严胜妙，除波利遮德迦及毘陀罗树，无以为喻。

佛在树下，大众围遶，端严而住，如星中月，处净虚空。时有十佛刹极微等诸佛，各各从本国土，来至于此，为欲庄严鞞卢遮那，为众会故，示菩萨形。其名曰：观自在菩萨摩訶萨、曼殊室利菩萨、地藏菩萨、虚空藏菩萨、金刚藏菩萨、无垢称菩萨、善成(二本威)德菩萨、能弃诸盖菩萨、宝手菩萨、大慧菩萨、普贤菩萨摩訶萨等，而为上首，如是等众，皆来集会。复有无量千俱胝诸菩萨众，示声闻形，亦皆来集。所谓：舍利弗多罗、苏补底没特伽良演那、罗怙罗、憍陈那、摩訶迦叶波、邬波离阿、阿泥律陀、缛丽缚多、阿难陀、提婆达多、跋难陀，而为上首。一切皆是久习所行六波罗蜜，能近菩提，为欲利益诸众生故，于此杂染佛土，示声闻形。复有无量千苾刍尼，摩訶钵刺闍钵底乔答弥，为上首，为欲调伏下劣有情故，虽现女身，具丈夫

业。复有释梵护世、天、龙、药叉、健达婆、阿素罗、揭路荼、紧捺洛、莫呼洛伽、人非人等，一切非凡，皆是菩萨，悉来集会。何以故？以彼诸佛有秘密法威德神通三摩地神变。云何菩萨，能得了知？乃至诸佛，威德神通，有无边力，一切法空，诸力得转。有情云何能得了知？如人梦中，见种种事，若觉悟已，即无所见，如梦中想，如是，如是！梦愚痴故，法体想起。诸佛觉悟，无有所见，以诸甚深无障碍品，利益有情，微细解脱，得成就故。

而彼菩提树下，薄伽梵端身而住，入三摩地，名不思議佛之境界。此三摩地，极胜广大。由此三摩地故，诸佛世尊，恒常入定，说时、食时、行时，乃至般涅槃时，如是严饰。佛薄伽梵，如妙高山王，如波利遮德迦树下安如意珠。而彼清净三十二丈夫相中，一切佛刹诸薄伽梵，如净圆镜，普皆示现。一一随好中，菩萨本所行行，皆悉显现。从初光照王因缘，乃至究竟定光如来，一一苦行事，所谓：能舍头目手足身分、妻妾男女、奴婢僮仆、作使大位宫殿等。

尔时，德藏菩萨摩訶萨，诸所修行未成正觉，请问普贤菩萨言：「佛子！如来所住三摩地，为是何等三摩地耶？佛子！云何自然十方佛刹中，度脱有情，佛事示现？佛子！此三摩地以何为名？尊者！此三摩地云何证得？」

是时普贤菩萨告言：「善男子！谛听！我今为汝宣说斯事。」

于是诸菩萨起尊重心，瞻仰尊颜，正念安住，同声说言：「善哉，善哉！德藏！如汝所问，甚为微妙，然彼尊者能知一切。」尔时，大地六种震动，所谓：动、遍动、等遍动，摇、遍摇、等遍摇，吼、遍吼、等遍吼，击、遍击、等遍击，旋、遍旋、等遍旋，开合上下、遍开合上下、当遍开合上下，东涌西没，乃至中边，亦复如是。当此之时，一切众生，所有苦恼，暂得休息，雨妙天华。

尔时，普贤菩萨告德藏菩萨言：「佛子！此三摩地是诸佛菩提。佛子！此三摩地名不思議佛之境界。诸佛世尊常住于此，从然灯佛得授记已，即于是时入三摩地。从是以来，无功用住，于一毛端处，有无量佛刹，乃至一切佛刹所有极微等诸佛刹土，普皆示现。或现生于覩史多天，从彼没已，下生入胎，住胎出胎，能行七步，而自唱言：『我应永离生、老、病、死，所作已办。』或现处宫，或现出家，修行苦行，成等正觉，降伏众魔，转于法轮。或现住世，寿无量劫，度脱众生所有苦恼，乃至示现入般涅槃。于一念中，

普能示现诸佛刹土。如上事业，于一念中摄一切劫，无增无减，皆无功用。乃至一切有情界未得解脱，一一刹那中，于一切处作诸佛事。是诸佛刹中，毛端际处，示现无量诸佛刹土。如是彼佛，无边威仪，然此威仪，周遍虚空，无有毛端处而无诸佛刹，亦无毛端处，而不于中，念念示现阿耨多罗三藐三菩提。一切诸佛，生现正觉，乃至般涅槃，于极微中，亦皆普现一切佛刹极微等诸佛刹土，复过是数无量无边。彼彼薄伽梵，示现覩史多天宫佛行行，示现度脱无量众生，佛土不小，极微不大。何以故？以一切法不坚牢，如幻、如阳炎。乃至究竟尽虚空界，如是无量佛事业起，刹那刹那，于有情所常作利益，无暂休息。譬如即此大菩萨集会十佛刹土极微等数量，于摩揭陀国十二綸缮那地分中，安住展转不相碍。如是，如是！于极微中，容受无量阿僧企耶诸佛刹土，有余佛刹，各各相向，或有相背，或有在傍，或有相纳，如是展转，不相障碍。如人梦中，于一处所见种种事，虽见非真实故，不能为碍。如是，如是！此诸佛刹，皆唯心量之所变现。或有世界，见劫火烧，或烧已尽，或见风起，或有清静，或有杂染，或现无佛诸刹土中，众生之类，随其自业，各见不同。如是，如是！无量变异。譬如饿鬼饥渴所逼，于殑伽河边，或有见水，或有见灰，或见脓血，或见便利不净充满。如是，如是！有情于自佛刹土中，或见杂染，或见清静，或见有佛，或见涅槃，或见大众会中说法，或有听闻第一义法，或闻广说檀波罗蜜，或见游行，或有见住，或有见坐，或见食时，或见二丈夫量，或见七丈夫量，或见一瑜缮那量，或见百瑜缮那量，或见千瑜缮那量，或见光明照耀，如日初出，或见如满月，圆朗空中，随其业行，种种见异。或见久远，入般涅槃，或有不闻诸佛名字。譬如饿鬼于河水边，有见猛火，或见异事，或见如是。如此大菩萨集会，各各于自佛刹土中，佛薄伽梵作菩萨形，或见有一佛刹土中，劫波火烧，或烧已尽，或见于此佛刹土中，众生界满，佛现饶益，有薄伽梵，取诸佛刹入一佛土中，令相似示现，如患瞽者瞽因缘故，不了众色。如是，如是！识因缘故，不了众相。」

于是普贤菩萨告德藏言：「佛子！我今为汝，略说此三摩地法。一刹那中，于一切处，乃至尽虚空及众生界，一毛端分量中无量无边佛刹，于一极微中法界极微等诸佛刹土，一一佛刹土甚多威仪路。如一刹那中为利众生故，有十佛刹土极微等数量，如是念念中，有一切处，乃至一切众生，未得阿耨多罗三藐三菩提，此饶益事，常不断绝。如是威仪，第二、第三、第四、第五，乃至十方所有诸佛，无量无边，威德势力，亦复如是。」

尔时，德藏菩萨闻说是已，于此三摩地藏，明了通达，入不思議诸佛境界，觉悟一切诸佛世尊神通威力，即于是处，以诸威力，善巧调伏无量众生。有百殑伽沙诸菩萨众，于三摩地法，种种觉悟，或有证忍位，或有证诸地；其中观自在等菩萨摩訶萨，譬如瓶水已满，置于雨中，终更不容一滂之水。如是，如是！住第十地诸菩萨众，所行妙行，皆已圆满，多时于此三摩地中，示现佛事，于一刹那能纳无量劫，于一极微能纳无量土，即于一念遍诸佛刹，任运度脱无量众生。

时薄伽梵住三摩地，放眉间白毫相光，名能发起，其光照曜，有功用行。诸菩萨众于十地中，亦未觉悟，由光触故，能见一切诸佛国土。所有住极微毛端分量处无量佛刹，即于是时，周遍虚空，无量无边佛刹示现，譬如琉璃瓶满中盛芥子。如是，如是！于一极微一分量中见诸佛土佛薄伽梵，于一如来身，一切如来色相显现。一一如来有无量名号，于一刹那中，一一佛刹土，利益一一有情故，自然示现此阿耨多罗三藐三菩提，如如意珠置高幢上，随诸众生，自然而雨种种珍宝。如是，如是！一切如来，阿罗呵，三藐三勃陀，无量众生自然解脱。何以故？以一切趣不坚牢，如幻、如阳炎。如是此诸佛刹土中，有情展转，不相障碍；如现神通者，山河石壁等，终无限碍。如是诸菩萨见彼佛威德，自身各各于一切佛刹佛世尊前，于一刹那中，一一如来所，一劫波供养，或二劫，或三劫，或百劫，或千劫，或一刹那，或一牟呼栗多，种种供养。于如来所，闻说波罗蜜多，或闻陀罗尼，或闻说诸地，见诸如来神通变化，以一切劫入一刹那，起难遭之想。云何如来，有此威德？于一念中现无量劫，而为我等生善根故，广演如此诸功德聚，无量劫所作不思議佛境界三摩地，觉悟如是威力，如是威德。

尔时德藏菩萨问普贤菩萨言：「尊者！作何功德证此三摩地耶？云何修习般若？云何布施？云何持戒？」

是时，普贤菩萨告言：「佛子！于十方处一切清净圆满佛刹诸众生类，其中示现无量佛事，诸菩萨等积集种种福德善根，应供养佛、供养法、供养僧、孝养父母，常不断绝。一切贫穷困苦、孤独乞匄，菩萨皆应悲哀摄受，乃至自身血肉，随应施与，勿生慳悋。何以故？以供养佛者，其福甚多，如是有情，受胜妙乐，速当证得阿耨多罗三藐三菩提。供养法者，生诸善根，智能增长，当得觉寤法自在故，于一切法，能正了知。供养僧者，种诸善根，而彼无量资粮增盛。由此菩萨乃至成佛，所有孝养父母或尊者邬波陀耶，或余生死中曾得恩处，当思报恩，倍令增长。何以故？以有情类知恩报恩者，设

于生死造罪业时，彼诸善根，终无散失。故诸如来，常赞报恩，呵责一切不知恩者。云何菩萨坚固成就一切善根？谓有贫穷孤独等类，于彼增长广大悲愍，以摄事法而摄受之。有福德者、有知恩者、有悲愍者，菩萨菩提现前，获得此三种田。如来已说诸菩萨等所作事业，应当觉寤，于一田，种诸善根，广大殊胜，成就圆满。

「复次德藏！诸菩萨众应当广大殖诸种子，令其善芽渐渐增长。此三摩地为菩提主，应先殖诸种子于佛前或形像所，华鬘、烧香、涂香、末香、歌舞音乐，如是等种种供具而为供养。即应如是思惟：『如先所说，于一切处诸佛世尊毛端分量及极微中，无有不见诸佛威德、诸菩萨等大众集会，我于彼所，以清净心，平等忆念，而作供养。谓一如来法性，即是一切如来法性，若我供养一如来，即一切如来皆已供养，于无量劫一如来所，供养亦尔。乃至多劫入一刹那，佛神力故，深生信解。』而彼菩萨殖种子，得成广大不思议佛之境界三摩地。善男子、善女人日日应作如此供养，于一切佛薄伽梵前，乃至一合掌，亦种子增长三摩地芽，滋茂广大，应以尸罗智慧妙愿而灌洒之。又诸菩萨应如是布施，不得简择持戒、破戒、若爱、若憎、若贫、若富，然彼富者，虽无所须，能施之者，自获利益。应当发起殊胜舍愿：『我定当作佛，度脱一切众生。于一刹那，一切处毛端分量中一切佛刹，我别别当成就，乃至一切佛刹极微等一切极微中尔所刹土，乃至一切佛刹极微，于彼彼中转正法轮。如今世尊鞞卢遮那如来，于一刹那中能纳一切劫，任运即于一佛土，我当示现无量威仪。如佛刹极微等一切威仪中，如是有情解脱诸苦，如殒伽沙乃至尽虚空界及众生界。』又诸菩萨应清净持戒，于破戒有情，起悲救护，不应于彼而生厌舍。」

时普贤菩萨告德藏言：「佛子！如汝所问，云何修习般若？汝应谛听，当为汝说。若有乐求无上菩提，欲令证得此三摩地，应当远离虚妄诸业恶语染意，发起净心，大悲摄受。应往精舍中，见甚希奇微妙佛像，安住不动，以金薄庄身，或纯金作，诸相具足，支节充满，于圆光中有无量佛，妙饰间列，结加趺坐，入三摩地。即于像前，恭敬礼拜，应如是思惟：『我闻十方现在所有诸佛世尊，无边无量，谓：一切义成如来、无量寿如来、宝幢如来、阿閼鞞如来、鞞卢遮那如来、宝月如来、宝日如来等，于彼广大，信乐尊重。』复应起想：『是此如来，深生尊重，乃至自然现前得见，于一切处，当审观察。』如是思惟，往空闲处，心正忆念，随近摄持，极一臂量，专注忆念，无令忘失；若有忘失，应更往观。如是观时，起尊重心，作现佛想，不应于彼作形像想，如是自然面见诸佛。应于彼所，以涂香、末香、烧

香、花鬘，右绕如是等种种供具而为供养，由一切心，如是摄持，佛薄伽梵自然现前，能见一切，能闻一切，一切心等，能了达故，数数决定，而取于相，复往空闲，心念不失。若有福德者，于三七日中，精勤修习，速疾现前，能见诸佛。有于先世所作罪业，如是之人，不能得见。若有希求，应起精进，勇猛修行，决定观察。何以故？由于一境，令心调伏，勉励专精，菩提资粮，无不成办。若多昏沈，懈怠放逸，自然如是，不能解脱，何况解脱一切众生所有苦恼？此如大地，真为重担。若如是者，于菩提直道，亦不能作精勤修习。譬如有人，于大海中饮一掬水，即为已饮赡部洲中所有河水。如是，如是！若修习菩提海，一切三摩地诸忍、诸地、诸陀罗尼，皆已修习。是故常应精勤勇猛，远离放逸，如是思惟，自然现前能见诸佛。

「若已得见，即应如是思惟：『此所见者，为是如来？为形像耶？』若觉寤此如来现前，即于佛所，长跪合掌，应当忆念，如先所说：『诸佛威德，由大威德及大悲故，今于我所，现前来也。』若能发问，即应请言：『唯愿世尊，为我演说不思议佛之境界大三摩地法。』而于其中勿生疑惑。设有所说，作决定心；若得听闻，即于是处圆满成就。或先业障不能申请，即应如是种种观察：『一切诸法，如露、如翳、如幻、如阳焰、如镜像；如是诸佛，犹如虚空，平等自性，非幻、非梦。然一切法，如幻、如梦，应当了知，由智慧悲，佛世尊现，今应为我放大悲光，令我苦恼悉皆销灭。』复应如是思惟，观察微妙空性。尔时，世尊从眉间白毫相放大光明，光名青焰，照触其顶，所有苦恼皆悉销灭，即于是处得法，名鞞卢遮那忍，种种三摩地皆能觉寤。于第七日夜，佛薄伽梵梦中现前，为授阿耨多罗三藐三菩提记。若如是知，此是形像，即应思惟一切如来及一切众生，如见形像，无实可得。如是，如是！一切如来，如幻、如化、如梦、如阳焰，自然如是；面见如来，如梦所见，皆非实有。如是，如是！一切如来，非生即生、非灭即灭、异于诸行、法性甚深、非说能说、非去而去、非来而来、非识所识、非我想、非命者想、非有情想、非养育者想、非补特伽想、非食者想、非蕴非不蕴，有似蕴相，十八界、十二处毕竟总无，亦非异彼。以一切佛、一切诸法，平等平等，皆同一理，如阳焰等。一切众生及诸如来一切佛土，皆不离想；如是想现，识缘于色，自性如是，终无有生，如来灭识，是故异色。观察应知，若一切法，不离于想，即识如来，毛端分量亦无差别，犹如虚空，平等平等。若我分别，佛即现前，若无分别，都无所见。想能作佛，离想无有；如是三界一切诸法，皆不离心。若能了知一切诸佛及一切法性惟心量，

得随顺忍，或证欢喜地，舍身他世，速疾生于妙喜世界，或生极乐净佛土中，常见如来，亲承供养。」

于是，德藏菩萨摩訶萨白普贤菩萨摩訶萨言：「佛子！若有众生闻此法门，受持、读诵、书写、广说，得几所福？」

时普贤菩萨告德藏言：「善男子谛听！此所生福量，譬如有人，摄取三界一切众生，令解脱生死，得阿罗汉果。复于彼所，起净意乐，无热恼心，经于百劫，以衣服、饮食、卧具、汤药种种供具，而为供养。彼涅槃已，起七宝塔，恭敬供养，其福甚多。若有众生闻此法门，生信尊重，亦不毁谤，复经百劫净修梵行，百劫修忍，百劫精勤，百劫修静虑，所生福聚，无有限量。若复有人闻此法门，生信尊重，能正受持，速得成佛，福过于彼。」

尔时，十方一切佛土中佛薄伽梵，皆现其身，赞普贤菩萨言：「善哉，善哉！佛子！如是，如是！如汝所说。」

于是释迦牟尼如来，从其面门放无量色光，照耀三界，雨众妙花，如是音乐不鼓自鸣，出微妙音，令心悦豫。是时大地，微细摇动，从光明中，演出无量妙伽陀曰：

「若闻此法心清淨，	获诸地定陀罗尼，
及忍自在妙神通，	速证无上菩提果。
当来能转于法轮，	还如过去大仙人，
一刹那中纳多劫，	于一极微现众刹。
无量众生满三界，	其中放逸受诸苦，
恶见系缚失正道，	念念度脱无空过。」

普贤菩萨说此法门时，千俱胝天人所有苦恼，皆得解脱，于阿耨多罗三藐三菩提，得不退转。

普贤菩萨摩訶萨于此法门，已善通达，现前证得。说此经已，时德藏菩萨摩訶萨及诸菩萨、天、人、健达婆、阿素罗等，一切世间，闻佛所说，皆大欢喜，信受奉行。

大方广佛华严经不思议佛境界分

【经文信息】大正藏第 10 册 No. 0300 大方广佛华严经不思议佛境界分

【版本记录】CBETA 电子佛典 Rev. 1.17 (Big5), 完成日期: 2011/02/23

【编辑说明】本数据库由中华电子佛典协会 (CBETA) 依大正藏所编辑

【原始数据】萧镇国大德提供, 维习安大德提供之高丽藏 CD 经文, CBETA 自行扫描辨识, 果赴提供新式标点

【其他事项】本数据库可自由免费流通, 详细内容请参阅【[中华电子佛典协会数据库版权宣告](#)】
